

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

Sarajevo
Maj, 2021. godine



Broj: 04-26-3-019-102-II/16
Sarajevo, 17.05.2021. godine

Na osnovu člana 25. stav (1) tačka e), člana 42. stav (2), a u vezi sa članom 4. stav (1) tačke a), b), c) i d), Zakona o konkurenciji („Službeni glasnik BiH“, br. 48/05, 76/07 i 80/09), postupajući po zahtjevu broj: 04-26-3-019-94-II/16 od 21.04.2021. godine Ministarstva zdravstva Kantona Sarajevo, ul. Reisa Džemaludina Čauševića br.1, 71 000 Sarajevo, radi produženja roka za postupanje po Rješenju 04-26-3-019-88-II/16 od 12.03.2021. godine, Konkurencijsko vijeće na 87.(osamdesetsedmoj) sjednici održanoj dana 17.05.2021. godine, je donijelo

R J E Š E N J E

1. Produžava se rok za postupanja po tački 2. Rješenja broj: 04-26-3-019-88-II/16 od 12.03.2021. godine Ministarstvu zdravstva Kantona Sarajevo do 30.09.2021. godine, koji je dužan u ostavljenom roku dostavi dokaz o izvršenju istog.
2. Ukoliko Ministarstvo zdravstva Kantona Sarajevo ne postupi u skladu sa tačkom 1. ovog Rješenja, izreći će mu se novčana kazna u skladu sa odredbama člana 48. stav (1) tačka d) i stavom (2) istog člana.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine je u postupku pokrenutom po Zahtjevu za pokretanje postupka zaprimljenom dana 22.06.2016. godine pod brojem: 04-26-3-019-II/16 podnesenom od strane Privatne ginekološke ordinacije „Clarus“, Skenderija 24, 71 000 Sarajevo, Poliklinike doktor Gežo, Mustafe Kamerića 10, 71 000 Sarajevo, Poliklinike doktor Kozarić, Radićeva 15, 71 000 Sarajevo, Ginekološka ordinacija Amira Frljak, Kemala Kapetanovića 13, 71 000 Sarajevo, Poliklinike doktor Nabil, Mustafe Pintola, 71 000 Sarajevo i Poliklinike „Atrijum“, Džemala Bjedića 185, 71 210 Ilidža, svi zastupani putem advokata Melihe Filipović i Kenana Ademovića, Čobanija 8, 71 000 Sarajevo, protiv Zavoda zdravstvenog osiguranja Kantona Sarajevo, Ložionička 2, 71 000 Sarajevo i Ministarstva zdravstva Kantona Sarajevo, Reisa Džemaludina Čauševića 1, 71 000 Sarajevo, dana 12.03.2021. godine donio Rješenje broj: 04-26-3-019-88-II/16. Predmetnim Rješenjem je utvrđena povreda člana 4. stav (1) pod b) i c) Zakona o konkurenciji od strane Ministarstva zdravstva Kantona Sarajevo, kome je naloženo da u roku od 60 dana od dana prijema Rješenja donese propise o osnovama, kriterijima i mjerilima za zaključivanje ugovora sa zdravstvenim ustanovama kojima se utvrđuju vrsta, obim i kvalitet zdravstvenih usluga koje zdravstvena ustanova pruža osiguranim licima, naknade koje kantonalni zavod osiguranja plaća za pružanje ugovornih usluga, način obračunavanja i plaćanja usluga i druga uzajamna prava i obaveze ugovorača.

Ministarstvo zdravstva Kantona Sarajevo je podneskom zaprimljenim u Konkurencijskom vijeću dana 21.04.2021.godine pod brojem: 04-26-3-019-94-II/16 dostavilo dokaz o uplati izrečene novčane kazne.

U navedenom aktu se također obavještava Konkurencijsko vijeće da je Ministar zdravstva Kantona Sarajevo imenovao Komisiju za pripremu Odluke o utvrđivanju većeg obima zdravstvenih prava, kao osnovama, kriterijima i mjerilima za ugovaranje po osnovu obaveznog zdravstvenog osiguranja sa zdravstvenim ustanovama sa područja Kantona Sarajevo, koja je počela sa radom.

Obzirom na kompleksnost akta koji se treba donijeti, a kojim će se urediti osnovi, kriteriji i mjerila za zaključivanje ugovora sa zdravstvenim ustanovama, te utvrditi vrsta, obim i kvalitet zdravstvenih usluga koje zdravstvene ustanove pružaju osiguranim licima, naknade koje Zavod zdravstvenog osiguranja Kantona Sarajevo treba plaćati za pružanje ugovorenih usluga, kao i načinin obračunavanja i plaćanja usluga, Komisija za pripremu Odluke, smatra da u ostavljenom rok od 60 dana nije moguće ispoštovati i donijeti kvalitetan dokument kojim će se riješiti predmetno pitanje. Sa tim u vezi se traži od Konkurencijskog vijeća da ostavljeni rok od 60 dana produži za još jedan razuman vremenski period kako bi se ovo pitanje riješilo na kvalitetan način. Podneskom zaprimljenim 04.05.2021. godine pod brojem:04-26-3-019-96-II/16, Ministarstvo zdravstva KS predlaže da se rok za postupanje po Rješenju produži do septembra 2021. godine, da bi se adekvatno pripremio propis na osnovu kog bi Zavod zdravstvenog osiguranja KS mogao ugovarati specijalističko konsultativnu dijagnostiku. Ministarstvo zdravstva KS planira da izvrši probno testiranje donesenog propisa da se vidi kako će to sve funkcionisati u praksi, jer se ni na koji način ne smije ugroziti funkcionisanje javnog zdravstvenog sektora. Sve ovo iz razloga jer se sa ugovaranjem specijalističko konsultativne dijagnostike, ne može početi polovinom tekuće godine, nego tek od 2022. godine.

Konkurencijsko vijeće je nakon razmatranja iznesenih navoda, iste uzeo kao objektivne i opravdane te, ostavio rok za postupanje po Rješenju broj: 04-26-3-019-88-II/16 od 12.03.2021. godine do 30.09.2021. godine.

U skladu sa članom 48. stav (1) tačka d) Zakona o konkurenciji, težom povredom zakona se smatra ukoliko se ne postupi po odluci Konkurencijskog vijeća iz člana 42. Zakona, te se za težu povredu može izreći novčana kazna u iznosu najviše do 10% vrijednosti ukupnog godišnjeg prihoda privrednog subjekta, iz godine koja je prethodila godini u kojoj je nastupila povreda. Takođe, Konkurencijsko vijeće može izreći odgovornom licu privrednog subjekta iz stava (1) ovog člana novčanu kaznu u iznosu od 15.000 KM do 50.000 KM.

U skladu sa navedenim, odlučeno je kao u tački 1. i 2. dispozitiva ovog Rješenja.

Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednik

dr. Stjepo Pranjić